

隨

山

館

猥

稟

詩之弊至今而極楊其中而荒其外者無論矣老師宿儒以成家爲極致於是因性之所近守先入之言一成而不可變擷其集首迄卒無甚異也乃囂囂然曰詩必如此而後爲成家且以命夫後之學者噫成家者固若是之寡乎吾謂凡所謂家者其宮室則有廟有堂有前榮後寢有賓客之所有庖湑之區溢而爲園囿則有臺有榭有池有亭明者爲牕暗者爲櫺奇者曰戶偶者曰門其用物則有案榻几席簾幙氍毹邊豆簞簋盤盂釜甗刀匕之屬其閨門則有粉黛衾裯釵鏡箕帚其飲食

則有饘粥酒醴果蔬魚肉其人則有家督有子弟有賓
客戚友臧獲婢妾家大小豐嗇不同而所有則未始一
可缺非如是不可謂之成家詩之體不一用亦不一廟
堂田里邊塞風寒高山大川之登臨一邱一壑之游泳
儒冠高論壯士悲歌曲房密室美人彈箏羈宦流民道
路嗟歎浮屠老子寂滅荒怪接於目者恆異感於心者
無窮若之何能以一律應也唐以來李杜爲其冠讀者
先具一李一杜於胸中遂覺判然不相合然余讀少陵
詩有絕類太白者如寄韓諫議送孔巢父之類是也波

大雅不作吾衰誰陳云云運筆結響能與少陵異乎蘇
文忠爲有宋第一其西山野梅之作則太白也洛陽相
君之詠於杜又何辨焉學者誠取諸大家平心而察之
溫李冬郎且無弗有此未可更僕數也必如是而後家
可成今使有撫一木一石者曰此吾家也抱一器而告
於人曰吾家具胥備於是得不笑其僣矣乎夫詩者人
之性情也性情者根於心者也心之不同如其面焉人
面目雖甚相肖亦必有豪髮之異其萬不能異者同於
天而豈襲取於人哉然則家之大小何以分曰貧家之

享客也竭其力以供張一日未始不足二日三日羸立見矣大家則不然食客數千人畢世從之而無虞其乏也大小之分其不在美善之多寡與余讀笑生詩數卷嘆其才絕美而學已不膚聽其論議又能肆應而不窮是所謂基成家而能大者序其詩盡吾懷以質之固知笑生不爲世俗之談所囿也言之協以否願爲吾進質之象州鄭先生咸豐辛酉春蜀人朱鑒成序

嘗讀鍾嶸詩品於諸家之詩必實其源自何人論者或疑其附會不知此古人分別流派之盛心也然予猶惜其能辨文章之流別而未能辨學術之流別是以淵明之詩儒家之言也其意淡泊而有守子建之詩雜家之言也其氣惕佚而無制許詢近於道家王儉近於禮家如斯之流未之分晰遂使千載而下篇章旣佚考索爲難斯讀者可以深慨矣汪丈穀菴今之隱君子也其立身行志皦然不欺出於儒家而其退然自居不欲爲天下先則又得之於道家故其爲詩也稱物芳而志彌潔

出辭婉而情彌深淵乎有憂世之心而在言逾孫泊乎
有高世之概而與物無爭易曰遯世无悶老子曰上德
若谷三復斯編殆於兼之矣余以謫陋無所通解然讀
君之詩知君之志又辱君兩世交聞其緒言因以悉其
學術之所在故敢愆愆付梓而君督之序亦泚筆而不
辭焉夫風雅道微輶軒不採下情無以上達而作詩者
又不能原本學術考察民隱淆然爲無謂之辭或僅僅
雕鏤蟲魚極命草木而詩學幾爲天下裂顧安得如君
者一二輩起而振之書至此不禁三歎亦願後之讀斯

編者推求至隱以余之言爲嚆引焉光緒十年十二月
萍鄉文廷式謹序

題詞

象州鄭獻甫小谷

淡雲涼雨供清愁一卷初開萬象秋
牙慧豔如梅下鶴心幾閒狎海旁鷗
騷人荷芰歸長吉怨女薔薇誤少游
用自題詩稿後絕句意而反之淶水紅蓮同泛處
元卿翻欲拜羊求

番禺陳澧蘭甫

嶺南風雅衰頽日拔戟詞壇大有人
幕府文章歸典碩山堂詩筆迴清新
兵戈已見滿天地杯酒何須問主賓
正憶秋城聞角夜霜風殘月最傷神

漢軍 陳良玉 朗山

嶺海亦詩國清才誰絕羣芙蓉三萬朵一一總思君江
淨真愁唾香多祇益熏如聞聞風頂招手謝塵氛

甯鄉 張 銑 壽全

杜陵詩作史陶令集編年盡掃箏琶曲恍聆牙曠絃春
深花爛漫秋淨月嬋娟骨格清如此披吟一灑然
桃花千尺水情重比汪倫今與論風雅應無愧古人笳
鏡喧極塞羅綺照芳春不盡悲歡意高歌信有神

汪君玉泉綺歲清才余知其工駢體工詩然未見其詩也前日沈君伯眉以其詩一卷見示披覽數過清圓如春鶯囀樹矯健如秋隼盤空言情寫景妙出性靈慨亂傷離時露風骨當此盛年進而不已他日必將於風騷壇坫中高置一席也番禺張維屏

煙波綺麗風月清新逸興遄飛感均頑豔上迫長吉義山下瞰君采四溟近壓仲則蘭雪而獨成一子矣三復贊嘆卓然可傳侯官林昌彝

笑生三十以前詩如萬柳樓臺百花闌楯氣之春也三

十以後詩如松風送籟澗壑飛泉時之夏也以視二十
歲前朗秀妍潤之作已再變矣爲之不已變而愈工必
將有澹遠如秋天雲靜穆如冬嶺雪者詩非變不能工
而其所以變則人巧所至天機應之蓋不期其變而自
不能不變也輒書數語爲他日之驗番禺沈世良

景方於三十年前見芙生詩卽知其工然止於詩之工
而已今年復遊嶺南乃悉見其三十年之詩巧者出以
樸濃者出以澹縱橫者出以和緩其用意深厚得古人
之微指蓋不止於詩之工而已景方欲爲之序迫於歸

里不暇以爲爲刪其十之三四而書數語於簡端以質
芙生竝以質讀芙生詩者會稽賈景方

穀翁貽辛中仁詩云布衣報國心期汝終不變觀穀翁
詩當以此求之若夫句律之工才藻之富則深於是道
者皆知之不俟贅語矣嘉善孫福清

隨山館猥橐卷之一

山陰 汪 璩

詩甲

三十六江樓

以下乙巳

我家三十六溪上來登三十六江樓西風萬里送寒意
對此茫茫生遠愁蕭然野色下黃葉邈矣客懷隨白鷗
他鄉有酒不能飲搖落山川何處秋

閉關

閉關謝塵事幽夢到煙蘿壞壁堆紅葉空庭暗綠莎風

懷因病減詩思入秋多賴有羊求在新寒載酒過

次韻寄王少香

樾

自樂衡門不掃門山林真許布衣尊
聲名何物牛心炙風度當年犢鼻褌
對酒休譚當世事讀書曾受古人恩
相思丁卯橋邊路料得吟詩似許渾

有贈二首

以下丙午

鴛鴦燕弱可憐生隔水樓臺隔院簫
共說花多難盡折其如春好總關情
座留荀令香三日酒醒桓伊笛一聲
待種櫻桃供鳳食不須重唱麗人行

鄂君翠被費相思
拍遍紅牙不自持
三月風華鶯曉曉
十年雲鬢免迷離
春因太早心尤惜
夢不能忘醒可知
寒地生材遺較易

香山句

可憐誰護小鶯支

江邨

試倚孤篷望江邨
罨畫閭人家多近
樹雲氣不離山
輭浪雙橈穩空舟
一客閑拈蒲風乍定
幾點白鷗還

聞道

聞道扁舟下若耶
許教人見舊容華
應知才思同香茗
畧記芳年近破瓜
三月樓臺尋燕子
一條門巷認桃花

相思會有相逢處
悵悵村西問浣紗

讀書

古今不相識
我乃思古人
霞想崇在昔
海懷盪無垠
求之文字閒
未必得其真
鶴企遠相望
鴻冥難與親
懷哉事云杳
逝者迹已陳
殘編一坐對
俛仰悲飄塵

出郭

平林漠漠草萋萋
野外人行路不迷
綠樹半依邨舍北
青鞵獨過板橋西
水田煙重立雙鷺
茆屋竹深啼一雞
誰與微吟遠相禽
扁舟漁唱接前谿

新秋偶興

秋意和愁寫簾鉤落日餘涼花雙蛭小古樹一蟬疎客
到嘗攜酒人閒欲著書此中幽寂境何似子雲居

與盧秋坪

洲

夜弈

疎簾清簟夜敲棋剝啄聲稀下子遲冷玉一枰人不語
客窗涼雨剔鐙時

夜雨同秋坪

秋氣入夜深陰寒若相逼瘦骨傍短檠人影背燈匿冷
雨訴昏黃暗蛩泣深黑故人同西窗旅食寄南國悲秋

多苦懷各有顛顚色寒聲振淒厲客思感階側孤鴻向
我鳴助我長太息江湖多素波稻粱未堪食

秋日偶興

落葉聲中晝掩關蕭齋風味足蕭閒吟懷清入夜來雨
病骨瘦千秋後山人在藥鎗茶竈畔詩成酒盞筆牀閒
空階近日無行迹認取蒼苔點點斑

七夕寄俞溥臣

洵慶

銀雲蟠蟠凝不流老鳥啞啞飛上樓天上紅牆望不見
人間綠髮生清愁牽牛花碧沁仙淚蘼蕪如烟記前事

仙城此夕羊燈明有客銅街共扶醉新詞一幅芙蓉篇
七襄欲奪霞機鮮衣香扇影相蟬嫣可惜不遇鸞幃仙
鸞幃又碾秋雲輦兩度星期鹿盧轉故人相望隔微波
鬢鬢銀河水清淺西簾月落鈴露寒涼痕深沁羅衣單
寄君一尺雙錦鯉樓上星辰江上水

白菊和秋坪

素袂伶俜欲折遲玉階秋色斷魂時蛾眉月上夜無影
鹿眼籬寒霜不知衰鬢相看人臥病粉翎微冷蝶相思
水晶簾外西風急臘作松陵唱和詩

皮日休有和
魯望白菊詩

珠江秋夜曲

白鷺潭上涼波起秋夢無痕墮烟水錦帆夜側鯉魚風
來去花田纔十里秋去秋來送畫船月光如水水如烟
痕搖縠縐波無際涼沁羅衣客未眠年年不換繁華處
屈指秋期不知數就中最是可憐宵紙醉金迷惟兩度
鸞梭鳳駕事茫茫乞巧筵開漏箭長願把玉簫凌碧落
不知銀漢隔紅牆更聞月滿清虛闕髮鬢霓裳歌未歇
漢女秋拋徑寸珠宓妃夜試凌波襪襪塵衣露總銷魂
鵲渡蟾宮兩不分此夜情如千尺水有人夢惹一窩雲

狎邪人住迷香洞倒挂綠幺憐小鳳一曲爭傳子夜歌
十年不醒揚州夢自謂青鸞總並栖人閒空唱汝南雞
驚鴻影轉迴波住顧兔輪殘翠黛低可惜西風來太早
鵲絃彈罷秋心老他時芍藥合歡花此日芙蓉斷腸草
斷腸重憶白蘋洲瑟瑟微波易感秋六曲闌干雙槳月
何人猶住木蘭舟

春陰

以下丁未

不獨寒輕暖亦輕二分煙雨一分晴隔簾草色青如夢
繞郭山光綠未成中酒人惟思小睡養花天亦助閒情

春愁別有難銷處每到斜陽感便生

春懷引用長吉韻

麝臍夜搗迷香洞繡被春雲壓愁重蠶牋細字記當年
尺八聲寒鎖么鳳夜抱海棠惹幽夢淚痕深沁紅冰凍
春魂飛向小屏山澹月和煙悄相送

次韻龔姚習菴

德傳

謝客清吟子野歌星離雲散奈愁何春如好友偏須別
夢爲懷人不厭多猶記丰神張緒柳自傷潦倒敬容荷
茶檣酒幔都零落一夜相思託綠波

得秋氣亭夜坐

清簾疎簾不受塵
池塘雨過晚涼新
空亭小坐無人覺
竹影和煙綠上身

觀孟蘭盆會

女蘿無聲陰火逗
青楓落葉颼風透
枯僧骨立誦酸文
一點羊燈綠如豆
大招小招何悲涼
新鬼故鬼同渺茫
何處秋墳三尺許
碧火老鴟作人語

早秋雜興二首

年光隨落葉奈此客愁何
古樹得秋早涼蟬向晚多殘

書供俯仰破硯重摩挲問訊簾鉤外斜陽幾度過

又是黃昏近西風助客愁重簾燈影晚疏雨市聲秋暮
色桐階早新涼茗碗收近來惆悵甚不爲賦登樓

秋夜作二首

孤燈若相思落葉若相語夜靜寒意生空階懽容與一
輪忽東上清光滿庭戶夕露沾衣裳人影淡如許秋氣
生淺深明月變今古感此無一言蟲聲暗如雨

西風似有約時至能相尋此氣已足悲况復當夜深
多不成寐清寒生枕衾小坐欲終夕載詠秋懷吟時序

有變易身世方浮沈一葉飛梧桐可憐如客心

夜

木葉下蕭蕭孤城夜寂寥雪垂平野暗風急大星搖遠
道家何在窮途淚不消半生湖海意撫劍坐寒宵

齋西有梅樹一偃蹇頽垣斷井閒生意不適今
歲入春後時加灌溉冬日初暖著花甚繁酌酒
其下輒成小詩

經年抱甕護霜根今日看花且閉門伴我清吟傾白墮
爲君小立到黃昏荒庭苔冷少人跡深院鶴來眠月痕

墜口會刊卷一
十一
坐對橫枝轉惆悵可能移種向山村

旅夜

如鐵重衾冷不溫夜殘挂壁一鐙昏五更夢醒忽聽得
風雨雞聲何處邨

數日暄和漸有春意

以下戊申

天借三分暖春教一倍添年芳來緩緩人意靜厭厭風
力軟於柳花光烘入簾東城山色好取次問青帘

郊行

春山啼遍子規聲茅舍秧田自在行挑菜年光三月暖

養蠶時節十分晴

春晚偶成

風信荼蘼到閒庭半綠陰愁多嫌酒淺人倦識春深
蠶作三眠態蜂含百和心芳時易惆悵都入短長吟

陸豐至海豐道中三首

侵晨召僕夫出門已亭午重陰壓四野白日翳不吐
紆回陟層巒微徑裊如縵曲旋磴蛇盤俯視峰蠟聚簷輿
虱其閒奇景愜求取樹遠惟見烟雲濃欲生雨行行聞
子規忽復見村塢

漠漠接平野去去周高原忽聞午雞聲知有遠人村少
息遇農父問答未厭繁別有田園意相會于不言行者
稻梁謀居者桑麻存茫茫在客旅此意難可論

遠道無遲留暫息難久止陟嶺逾千盤趣途將百里衣
墮松上雲琴鳴澗中水寓目聊可觀勞肩未能已孤塔
表邨墟夕陽滿山市炊烟一縷生先見僕夫喜

自平山買舟至惠州二首

行滕甫就解利楫已旋攢舟師理篙櫓五兩隨風飛望
望雲樹遠漠漠江波微欵乃盪空綠遲回留夕暉高城

在雲際隱約藏煙霏遙望未可卽疑是乃更非
直破煙千層任此颿一葉燈火三兩星隱隱見城堞曲
岸卸短篷夜江罷孤楫潮生星影動天遠波光接亦如
過江宿正未厭輕牒掩窗得高臥清夢已先愜

洛陽女兒歌

洛陽女兒顏如花珠簾玉樹詡容華照影居然擬西子
登牆生小住東家東家宋玉知誰是燕尾歌聞貴公子
錦瑟遙傳翡翠窗重門不隔芙蓉水相逢爲唱麗人行
幾日繁欽賦定情明珠擲去輕三斛油壁迎來駕六萌

狂夫意氣方殊眾自謂秦樓跨雙鳳陌上無人見莫愁
帳中有女名來夢綠窗親寫十眉圖卻月橫雲事有無
但覺同心惟碧玉慣將如意碎珊瑚桂梁蘭室韶華早
歌舞教成顏色好芍藥春風並蒂花靡蕪夜雨相憐草
幾度吹簫向紫煙雙飛雙宿自年年花開香國都如錦
人住迷樓總是仙別有若耶溪上女閉門不問藍田杵
自甘顛顚飼紅蠶不願清歌傳白紵璘籍親纈寡女絲
流黃心緒有誰知貧家獨織寒鐙夜正是紅樓宴罷時

重九日偕溥臣李叔銘

成業

秋丞

成勛

昆季馬

荀勗

文鏡

孫勤菴

長恩

粵秀山登高歸集溥臣

衡華閣

西風吹黃塵秋氣滿城郭
令節生曠懷邈然寄寥廓
招邀同唱登天行直上騎羊古
楚庭樓空遠見海氣白雲
消逾覺山光青斜陽一片呼鸞道
黃遍越王臺上草登臨何必說
重陽如此江山看總好須臾興盡
重歸來杜陵草堂爲客開座上人
同竹溪逸甕頭酒滿桑落杯客
能吹笛我長嘯忽學驢鳴忽援蹕
友生情重山川奇我不能狂天亦
笑莫辭各留詩一篇斯遊過眼成
雲烟當

隨山館猥藁卷一

歌對酒尋常事難得相逢皆少年

夜坐吟

嚴霜倒飛入簾幙燭花斜趁歌聲落琵琶一曲十指寒
舞衣如冰不堪著獸燄微紅虬水深銀釭玉佩光沈沈
空梁塵多飛欲盡清歌有聲妾有心

送十三兄之信宜二首

風吹紫荆樹花葉多參差兄弟寄異鄉乃復逢別離去
年秋七月見君圭山陲今年冬十月別君珠江湄骨肉
幼睽隔相聞不相知長大一識面又復當臨歧風高絕

岸動天闊空江遲與君此爲別明日長相思

相思夫何如落日滿江樹山川望迢遙君當從此去去
去不可留士節在寒素雖無陸賈金勿作王粲賦古來
賢達人大抵出韋布努力崇修名浮榮復何慕

無題

河陽芳訊太遲遲別隔春殘客未知千里外人無信息
十年前事怕尋思關心鸚鵡呼郎日屈指桃花結子時
定作負情儂也否玉烟珠淚義山詩

十二月望夜溥臣見過

寒生竹屋紙窗前客到詩囊茗椀邊
芋火紅爐忘夜久梅花綠酒借春先
故人相對憐今夕明月重圓要隔年
島瘦郊寒成一笑清吟還戀舊青氊

冬日過淨慧寺

寂歷招提境經過亦偶然殘碑留客久
古塔受風偏樹千秋劫梅花一笑禪
老僧夸妙墨約略認坡仙

寺勝力榕

二字是

東坡書

葛將軍妾歌

並序

客有言葛將軍妾者故越人不詳其姓氏道光辛丑

公爲定海總兵英吉利犯定海力戰六晝夜援師不至
歿於陣妾遽集婢僕及賸卒得數百人奪公屍歸葬於
山陰蓋奇女子也震澤趙良甫函作十哀詩紀公死事
甚詳而不及其妾余作此詩補之公名雲飛亦越人

舟山潮與東溟接戰血模糊留雉堞廢壘猶傳諸葛營
行人爭說張巡妾共道名姝越國生苧蘿村畔早知名
自從嫁得浮雲壻到處相隨卻月營青油幕底紅鐙下
緩帶輕裘人雋雅月明細柳喜論兵日暖長楸看走馬
一朝開府海門東歌舞聲傳畫角中不問孤軍懸渤海

但思長劍倚崆峒新聲休唱丁都護金合牙旗資內助
虎幄方吹少女風鯨波忽起蚩尤霧一軍如雪陣雲高
獨鑿凶門入怒濤誰使孝侯空按劍可憐光弼竟抽刀

淒涼東嶽宮前路

公殉節處

消息傳來淚如汪三千鐵甲盡

蒼黃十二金釵齊縞素繡旗素鉞雪紛紛報主從來豈
顧勛已誓此身判九死頓教作氣動三軍馬蹄溼盡燕
脂血戰苦綠沈槍欲折歸元先軫面如生殺賊靡娥心
似鐵一從巾幗戰場行雌霓翻成翬日明不負將軍能
報國居然女子也知兵歸來慟哭軍門柳心與孤臣同

不朽祇恨凝之海上軍不如李侃閨中婦一樣桃花馬
上身蛾眉今古幾傳人君不見同鄉舊有蕭山沈異代
猶夸石砭秦

龐娥句亦作討賊張婁心似缺晉書列女傳論張婁報怨於強寇謂張茂婁陸氏也

無題二首

一曲霓裳憶大羅玉局閨苑舊曾過前身明月如人澹
昨夜微雲入夢多細雨櫻桃眉子硯曉風楊柳膽嬌歌
從頭記取相逢日天上黃姑欲渡河

元珠暖玉辟寒金不抵靈犀一寸心自錄新詞河北紙
濃薰小像海南沈簪錢年紀憐春早剗鞞情懷待夜深

最是迷藏樓下路更無人處冒相尋

底事

以下已酉

青鸞重問女牀棲霧閣雲窗路不迷十樣箋還留硯北
七香車總駐街西屏山匿影金鵝舊井水聞歌玉虎低
底事催人容易別曉鴉啼後早鶯啼

望海

元氣合天地大觀無古今潮來千騎疾島隱一螺沈風
雨蒼龍起波濤白日陰蠻陬嚴壁壘想見昔人心

春遊二首

酒旗風裏試春晴
桐帽機鞦自在行
今日斜陽前日雨
木棉紅出越王城

十里桑陰一棧田
春光都在野橋邊
雨晴山意向人笑
風軟水痕隨岸圓

富國

富國需奇策
談兵憶古風
憂勞煩

聖主爵祿在諸公
九府論圖法
三軍望戰功
儲胥終有恃
未敢贊和戎

不戰

不戰遠人服時清萬里同懷柔

明主意鎮靜大臣風細柳方堅壁扶桑早挂弓從來疆
場事有備卽奇功

夜雨

簾外雨絲絲東風一夜吹蟲聲人靜後鐙暈夢回時舊
事香篝換餘寒角枕知明朝深巷聽花信莫教遲

戲和少香效疑雨集之作

小市東頭路狹斜玉鞭剛指泰娘家樓藏春影絲絲柳
窗透波紋面面紗茶亦醉人何況酒竹能笑客不如花

踏青休負明朝約試取輕盈小鈿車

原作

錢塘王樾少香

畫樓近接素馨斜小住相藍小玉家
卯酒泥人分罰
蓋春衫嫌暖換輕紗分曹戲賭相思子
翦勝剛成末
麗花一種柔情兼慧性相迎安得六萌車

柳花

舊時門巷舊窗紗曳雪牽雲認不差
青粉牆遮煙一抹
紅欄橋隔路三叉銷魂水驛何人洒
落魄風塵到處家
飄泊心情離別恨白濛濛地卽天涯

素馨斜

青山如黛城西路有客來尋美人墓一棱平田十里花
相傳此是埋香處蘊香舊事說花田執挺降王正少年
鶴禁宮人齊入道魚英珤器各爭妍就中有女居金屋
姓名早刻茗華玉候監開窗貌最姝樓羅註歷歡難足
移得蕭閑一寸心雲和團扇受恩深媚豬不敢爭殊寵
買燕何曾費耍金水晶苑裏秋風早扇子亭中秋月好
弄玉霞裾仙藥來麗華月殿新妝巧淡掃青蛾著紫霞
韶顏如玉厭穠華嬌隨鬪主紅雲宴喜插神仙白柰花

看花侍宴歡娛盛天女如何偏示病方藥難留椰子壺
春風竟短桃花命一從簫鼓葬西施贏得君王幾日思
敕賜金蠶蒙葬地魂銷玉樹折瓊枝瓊枝已折情難已
轉憶當年愛花意爲道花開如見人墓田盡作栽花地
墓上花開玉有痕傾城名字至今存東都舊例司花女
西楚名姬舞草魂一般青冢皆陳迹訪古尋常來過客
豔說荒邱土一杯誰傳遺事碑三尺風流更勝小南強
但到花時土亦香金粉都銷人不見一雙蛺蝶自斜陽

雜詩四首

賢達慕道德才士專文章趨向雖不同意氣相頡頏吐
辭戛八風振采成七襄被褐自矜許豈必膺明揚南山
隱文采丹穴鳴歸昌目論雖相輕此事復何常

天風吹客心浩然盈九垓浮沈復何益不若尋蓬萊雲
覆瑯嬛室日照金銀臺長生如何求五銖躡飛埃玉液
不易飲瑤闕何時開邈矣王子喬斯世無仙才

騁望登高邱川原浩茫茫重雲壓平野落日迷大荒左
盼昌華宮右眴歌舞岡霸業今已矣草樹紛縱橫盛時
有變易志士多煩傷願爲黃鵠舉奮翅乘風翔

歲暮多朔風嚴霜被百草斯時惜芬芳夙昔猶美好冠
蓋隨青春車馬喧白曉尺波忽已徂丈組難自保往事
泣齊瑟餘力謝魯縞所以古賢達榮名爲身寶

尺五齋與杜仲容

友韋

季英

雋

昆季夜話

深談不覺燭花殘醉後狂歌來日難遠道關河爲客久
虛堂風雨逼人寒朱絃古調能相許青鏡塵容只自看
敢說元龍樓百尺祇應豪氣未闌珊

擬出塞行

丈夫旣許國不復論死生按劍出門去萬里如家庭登

高望山川長嘯天爲青
安知百世下史冊書姓名將軍
出馬邑校尉馳龍城戰苦戈戟殘
道遠霜雪清野馬嘶
落日哀笳動連營此時不封侯
嗟哉李北平

博羅農掘地得古劍一友人以示余爲作一絕句

千載沈薶赤堇銅血痕猶沁
土花紅要知不作干將折
只在鋒鋌盡去中

夜坐

欲眠猶未眠風露忽如許
月暗荒苔深牆陰一蟲語

江樓夜宴聞笛

海霧三更靜江樓四面開
何人吹鐵笛明月忽飛來
醉墨沾衣袂豪情付酒杯
欲吟黃鶴句安得謫仙才

秋夜小集眠鷗館有感二首

池館重來記昔遊涼螢飛上水西樓
故人相對又今夕高樹有聲知已秋
檀板烏絲當日事梧桐白露幾分愁
紗窗鏡檻蒼涼甚不醉何緣得小留

欲將豪氣敵閒情無奈桓伊玉笛聲
香國燈圍花四壁畫屏秋冷月三更
再尋舊燕巢都改臘有閒鷗夢不驚

認取得憐堂畔路苔痕如繡自分明

寄秋坪新興

故人新典肅爽裘可有黃花伴客愁
一夜秋心千里夢
西風吹到古新州

秋夜同季英

明月忽在地長空微有雲
今宵風露下秋與故人分

秋日小住陸氏園雜詩四首

四面窗紗一角亭雲廊水檻舊曾經
西風幾日梧桐樹
便覺秋聲不可聽

依舊亭軒近水開一條石徑滿蒼苔疏林黃葉落初盡
墀影已隨斜照來

回廊曲折小庭空人住疏蘭瘦竹中曉起石闌干外立
一枝霜信雁來紅

一般衰柳與殘荷幾度園林載酒過忽憶香山居士語
主人來少客來多

茆屋

青蟲抱樹枯黃葉穿窗入茆屋人讀書秋風夜來急

冬曉遊郭外諸山作

清晨寡人事孤遊澹吾慮遠接天際想少涉巖上趣初
日明遠峯生煙出深樹爽氣陽岷暖嚴寒陰嶺沍登降
苦奔峭攀躋怯迴顧目眩臨高壁心迴得微路盡日未
可窮移時復還去此中豈無人銷聲託元素遙儕東郭
雪近隱南山霧披榛覓幽蹤握蘭寄遐慕涼風吹白雲
邈然不知處

正月五日偕盧竹樓

坦

秋丞葵生

承檢

昆季游

郭北離明觀

以下庚戌

條風欲扇和妍日初破凍新春五日過遊趣四人共情

晨出山郭平埜消霧淞賞心貴能適佳處豈在眾道流
闢茆宇餘事抱花甕客來遂幽尋地僻謝喧闐幡影經
院深草香石壇種十年更游歷庚子夏會游于是萬象入嘲弄
坐見樹蔭移靜聞鳥聲哢草亭許偃臥石枕謝塵夢覺
來碧山暮歸去白雲送儻此焉腳勞小飲未須痛

春暖二首

綠楊低護小闌干倭髻妝成鏡裏看天意養花人中酒
二分春暖一分寒

銀箭聲催第幾回鎧花如笑向人開流蘇宛轉香篝暖

抱得春雲入夢來

曉坐碧痕館作

殘月半低樹曉煙多在花綠窗人未起深掩一重紗

雨

一鐙挂壁夜聽雨三日閉門人讀書酒盞漸疏裘盡典
遠山愁對病相如

感懷

不必言愁始欲愁天風吹冷木棉裘時平下士休捫蝨
身賤他鄉合飯牛世事難憑驚海若壯懷無著負吳鉤

金銀宮闕荒唐甚尙擬乘槎問十洲

謝溥臣寄仿南田畫冊用山谷集中謝斌老送

墨竹韻

熙筌去我遠畫手孰前輩落落暉草衣學者不易逮氣
格隨世變元精在神會規無形似閒養指失肩背後起
繼前徽今世幾人在吾子探畫苑意與昔賢配朱鉛出
古色可敬不可愛人疑南田生氣出東絹外貽我一巨
冊重較兼金倍魚鳥含生機花木無定態君畫與我詩
遙遙兩相對作此寫傾倒勿訝言語大

短歌行

青天太高白日何促悲來如何歌以當哭道路萬里浮生百年南山作地東海可田登高而呼茫茫四野古人不作誰知我者富貴死灰不足以豪男兒可憐乃求錢刀酌酒自寬羈景回照我與松喬相視而笑

春詞二首

輕寒如水逼熏籠破曉猶吹料峭風覺道夜來微有雨
桃花紅入小樓中

東風吹雨上簾鉤簾外烟痕澹不收三日春寒禁不得

梨花如夢替人愁

春夜偕季英小飲

讀書好色還耽酒懷抱何時得好開我輩性情無變相
古人奴隸亦奇才草堂夜靜簷花落谿屋春深海燕來
交態百年愁萬斛今宵休惜玉山頽

過仲容尺五齋時方約游黃木灣

揚碑未到南海廟飲水安得西神山買鄰結屋十年約
閉戶讀書三日閒風靜鑪煙藏竹塢草深石徑掩柴關
尋君不遠城西路只在鐘聲塢影閒

長歌贈季英卽書其詩卷後

豫章七歲才嶽奇出地早具凌雲姿黃鵠初生弱毛羽
其氣已欲摩青遼古來英物不世出但有跡弛無委蛇
直從少小出奇賞此意要豈常人知杜陵野老有詩裔
脫落凡俗含光儀昔年邂逅方總角照人風采疑通眉
才鋒遠勝百鷲鳥意氣足卻千熊羆竭來數年復相見
風神疏放形清羸懷鉛握槧不諧俗往往轉受下士嗤
新詩束筍出示我欲泣風雨諧金絲霜顰縱或有顛蹶
雲翮已覺難禁追我驚此才不易覩坐令心折神爲移

愛君未免有奢望請以譚語相箴規古人爲學無止境
巨構大抵由初基精金赤堊待辟灌他山白壁須磨治
要從雄快化端靜高下遠近交相宜駭浪鯨魚掣溟渤
坳堂芥子藏須彌陶鎔旣久功力滿然後可與前賢期
天涯三月二月時春光澹淹春聲遲與君劇譚不知夕
東風息息來相吹贈以長歌快傾寫不必黃絹夸妍詞
明朝過我論文字一尊相屬宜同持

廣州春感四首

翠柏明霞共此生客愁如水不能平浮邱地近丹砂少

澎湃潮來赤岸驚夜雨
枕柳劉龔塢春風榕樹越王城
鉛刀與汝皆無用古壁塵多一劍鳴

黃木灣頭海霧昏百年世事任乾坤
早時冠冕通南極此日旌旗壯北門
人不帶牛雲有子地能集鳳竹生孫
遐陬正在昇平日獨客煩憂付酒尊

藏用仙人換劫灰訶林遺宅亦蒿萊
金銀莫夜無生氣詞賦中原孰俊才
澤國魚龍終夜靜鄉關鴻雁幾時來
草元亭子偏寥寂深掩閒門養綠苔

蓋篋蕭然袒褐貧高樓吹笛笑南鄰
賣文可活非今日

負米無能愧古人
齊贅滑稽原有託
楚狂潦倒莫相瞋
遊秦入洛終非策
欲覓箕山寄此身

湘瑟

湘瑟初彈第幾絃
閒愁如水復如煙
夢魂弔月魚丁枕
粉印零星鳳子箋
下土言情皆色相
美人無福不神仙
梨花簾外春寒重
檢點春衫一惘然

綺窗

門掩枇杷樹樓藏翡翠簾
綺窗金冉冉深卷夜厭厭
風送琴三疊人來月半檐
殘尊分密坐同伴絕猜嫌
翹袖

回腰細明璫裏手拈鵲絃珠串串雁柱玉纖纖情更通
眉語寒應到指尖辛香瑤席近甲煎珩鑪添曲室留賓
久層城下漏嚴酒懷如小夢鐙影隔重簾柳弱知春早
花愁與病兼定情才主簿賦別又江淹北宋師師令南
朝昔昔鹽銷魂舊詞客爭忍寫吳縑

東堂

荷風竹露總相思回首東堂感不支沈水雙煙人半臂
去年今夜納涼時

江村寫望

樹圍茆屋水圍村
村畔人家白板門
破網未收煙欲溼
一竿黃竹試潮痕

入羚羊峽

四面青山影飛來
一葉舟灘聲初過
雨水氣忽如秋賦
命輕奇險勞生慣
遠遊漂搖感身世
江上媿閒鷗

道出新興十三兄來舟次夜話

驚喜真疑夢扁舟
此對牀風煙同遠
道兄弟又他鄉
星動江湖落雲開
驛路長今宵殘燭
下回首憶西堂

雨後江水大漲

千里飛烈風兩厓逼高浪水勢挾狂飈力與眾山抗況
復愁霖過連江益川漲急流無回旋噫氣重鼓盪草木
盡披靡鼉鼉互奔放波心飛忽高石角兀相向平生足
遊厯山海供跌宕不謂荒僻區見此復神王飛騰詫白
波卓立羨青嶂雨止江亦平臨風發高唱

夜宿電白旅邸

孤館易黃昏風高客到門亂山圍古戍深樹暗前邨客
路雲千里鄉心月一痕殷勤憐野老餉我足雞豚

曉發大路坡

樹黑荒村遠沙黃古道迷殘星臨水大曉霧壓山低行
旅勞琴劍殊方厭鼓聲

時廉州方用兵

壯懷墮蒼莽何事復聞

雞

高州道中雜詩三首

飛蓬無定根貧士多遠遊一爲勞者歌千里來荒州山
深生奇寒日落如深秋往往遊奇險心目不自謀危途
僅咫尺下有急礮流虎行密箐折猿嘯空林幽行滕偶
一解凜然難久留桑弧平居志至此增煩憂飢驅自古
昔戚戚將誰尤

谿風颯然生山雨忽而至此中秋未來黃葉已滿地曲折山谿中徒御行不易褰裳風復寒下帷雨難蔽稍稍出脩途愁破見岷寺遠岫青欲浮平田綠無次

急瀑飛高峰其勢必下注谿澗一受之眾流悉奔赴怪石生當中衝激作奇怒澎湃方壺鳴岬嶸猶虎踞極力爲爭衡其意若相妬遂令白練飛莽然四森布殷雷鳴一山噴雪濺百步僕夫蹋波行淺流仍屢渡奇觀旣目眩異響復心怖山行無遲留見此爲少駐高詠蒼茫間天風吹日暮

洗夫人廟

錦繡千秋氣靈祠百戰場封畱舊譙國名重古高涼月
陳迷殘壘雲旗指故鄉如何陳苑裏學士女兒妝

五月十八夜聽雨

檐花落盡雨蕭蕭損我閒階幾尺蕉竹屋生寒人不寐
一鎗紅澹記今宵

絕句

一雙影瘦黑蝴蝶三百顆圓黃荔支立向竹陰閒看取
單衣涼透午風時

讀王笠舫大令衍梅綠雪堂集一首

飽得金莖露一杯仙雲都向筆端來
文心一寸能終古生面千秋許
獨開花月有情成小劫江山無福失奇才
紅棉開遍呼鸞道誰上城西百尺臺
先生木棉花詩數十章皆遊廣州時作

手把芙蓉出玉京詩懷豪放酒懷清
銀濤萬里秋無際鐵笛三更月有聲
顧我難爲鄉後進拜公如見古先生
楞嚴齋畔春何似應有梅花識姓名
先生任廣州時楞所寓曰小楞嚴齋

寄葉蘭臺衍蘭

風流蹤跡太清狂
除卻柔鄉卽醉鄉
佳士性情疑蛺蝶
詩人名字借鴛鴦
石林詞好春如夢
畫苑花多墨有香
忽憶湖光亭上句
此時烟樹正微茫
蘭臺鴛鴦詩有笑
我夢寒猶待闕有
人情重不言仙二語爲
時所稱故以崔珏爲比

古榕屋雜詩二首

寂寞維摩十笏齋
涼風入樹雨生苔
能爲寒士原奇福
便作詩人已不才
南阮疏狂聊復爾
東方詰屈幾窮哉
忘機鳥雀皆相識
得食階除肯見猜

飽喫盧仝七碗茶
北窗跂腳鼓琵琶
如人促彊前朝樹

與我周旋僻地花噩夢百年嗤蝱穴繁聲兩度厭蜂衙
百錢學得東坡法日日齋頭響畫叉

七夕有懷

西風吹到可憐宵尺五雲羅尺八簫料得玉屏還向月
應知銀浦不通潮相思有字青鸞寄往事無痕綠蠟銷
欲訪支機舊時石靈槎天半太迢迢

初八夜

依舊銀雲似水流更無人上曝衣樓紅牆小隔無多路
青鳥歸飛各自愁一樣星辰憐昨夜十分風露怯新秋

鄰家兒女嬌慵甚玉匣蛛絲冷不收

擬古二首

河漢清且淺北斗橫闌干牛女不相見眾星燦以繁中
夜啟西牖撫膺坐長歎良人別已久何時當來還歲月
行侵尋霜下蕙草殘馨香久不采蕉萃誰爲看貞素終
自持相知良獨難去去萬餘里安得凌風翰食蓼識心
苦衣葛知身寒憂來不能語獨取鳴琴彈

茗茗泰山阿中有孤生竹直節凌元雲清聲和嶰谷伶
倫製長笛更作龍吟曲苦調由義心吹之不諧俗清商

激涼風秋氣滿羣木懷哉知音人千秋動遐矚

邨居絕句二首

刺竹編牆水滿池蘆簾茆屋澹相宜西風破曉客初起
扁豆花開秋一籬

趁月來尋野老家閒塍小立話桑麻夜深風葉香如許
錯認平田有稻花

舍北閑眺

人語橋西靜山光舍北多秋心分水竹詩思入煙蘿花
瘦扶黃蜨萍開讓白鵝江村好風景真欲買漁蓑

九月晦日喜雨

山雲日日生一月不成雨火氣入商金驕陽作秋暑謝
客解萬巾攤書掩蓬戶作詩誚龍公掉罄出奇語豐隆
爲不平匄噤意如怒驅雲立海水驟至不容阻雨師氣
浩然義勿受輕侮甘澍洗亢旱小過自能補落葉滿空
邨長風過平楚坐令涼意生蕭條入庭宇書生正端居
晝晦孰華子賴此祛鬱蒸欣然坐環堵買春雖非時渴
疾會當愈試瀹竹鑪茶清泉洗靈府

晚秋過李氏清芬草堂

水榭知秋早柴扉爲客開
檢書紛落葉坐石惜新苔
蘭氣如人澹松聲學雨來
平生足幽興臨去重遲回

冬日高州寄蘭臺秋丞苟船仲容季英廣州

北風蕭蕭天雨霜前飛
鴛鴦後鴛鴦風塵滿地故人遠
望而不見心煩傷生長南交二十載并州久矣如故鄉
同學少年盛意氣雲龍上下相追翔買鄰千萬友三五
張南周北劉中央秋雨尋碑淨慧寺春風聯襪歌舞岡
但知端復共名譽豈識蘇李悲河梁人生聚散眞尋常
晨風之翼俄分張殘書兩篋劍三尺蕭然襪被來高涼

卽今五嶺正多事頗聞烽燧生巖疆少府金錢募戰士
將軍銅柱威殊方旅人少小聽鼙鼓壯志頗欲爭劍鏑
胡爲刺促倦行李坐使故舊成參商天風吹我征衣裳
書生作計猶能狂不能請纓繫南越要須把酒偕東陽
會騎千年海中鶴來覓五色仙人羊二禺山頭一相見
喚起曉日開扶桑

感興寄友人四首

戰地金潏近嚴霜鐵騎愁珠光沈合浦劍氣接交州畫
角聲何壯機槍黯不收提封此臂齒漆室亦煩憂

舸艦迷藤峽旌旗出桂林犬牙諸郡地馬革幾人心銅
柱殘銘壞昆侖毒霧深淒涼鬱林石風雨或銷沈
桂蠹佗城遠梅花庾嶺寒故人何日見行路此時難閒
道防兵革寥天惜羽翰相期把詩卷風骨共尋看
少日常爲客荒城早閉門塵埃猶白屋風雪自黃昏感
舊人千里閒居水一村杜陵同谷事翦燭待重論

陽春道中

山行隨處見桑麻竹樹參差石徑斜野店黃泥人賣酒
布裳青笠婦還家百蠻風土悲生事千嶂冰霜感歲華

今夜消魂東去路孤邨細雨夢梅花

隨山館猥稿卷之一終